

- प्रधानमंत्री नरेन्द्र मोदी काल 51 हजार ऊं बत्ता नौजवानां ने नियुक्ति पत्र देवेला-जयपुर अर जोधपुर मांय ई रोजगार मेळा लगाया जावेला।
- प्रदेश रा सात विधानसभा हलकां मांय व्हेवण वाळा उपचुनाव सारू दाखिल करी ज्या पर्चा मांय ऊं ग्यारह खारिज करी ज्या।
- राज्य सरकार माइनर खनिज पट्टा धारकां री लीज री मियाद बधावण रो हक खनिज इंजीनियरां ने दीनो।
- भ्रष्टाचार मुक्त समाज बणावण रा मकसद ऊं देशभर मांय आज सतर्कता जागरुकता सप्ताह सुरू व्ह्यो।

000

प्रधानमंत्री नरेन्द्र मोदी नुवा नौकरी लाग्या 51 हजार ऊं बत्ता नौजवानां ने काल वीडियो कांफ्रेंस रे जरिये नियुक्ति पत्र देवेला। अ रोजगार मेळा पूरा देश मांय 40 ठौडां लगाया जावेला। नियुक्ति पत्र हासिल करण वाळा नौजवान केन्द्र सरकार रा न्यारा-न्यारा मंत्रालयां अर महकमां मांय नौकरी करेला। प्रदेश मांय ई न्यारी-न्यारी ठौडां रोजगार मेळा लगाया जावेला। जयपुर मांय लागण वाळा रोजगार मेळा मांय केन्द्रीय मंत्री अर्जुनराम मेघवाल ई मौजूद रेहवेला। जोधपुर रा जय नारायण व्यास शिक्षण संस्थान मांय राख्या जावण वाळा रोजगार मेळा मांय केन्द्रीय संस्कृति मंत्री गजेन्द्र सिंह शेखावत ई सिरकत करेला। नुवी नौकरी लाग्या नौजवानां ने आईगॉट कर्मयोगी पोर्टल माथे मौजूद ऑनलाइन मॉड्यूल कर्मयोगी प्रारंभ रे जरिये बुनियादी सिखावण लेवण रो मौको मिलेला। ई पोर्टल माथे 14 सौ ऊं बत्ता ई-लर्निंग कोर्स मौजूद है। अ कोर्स नौजवानां ने काम असरदार तरीका ऊं करण सारू जरूरी चतुराई सिखावण अर विकसित भारत बणावण री दिशा मांय काम करण सारू तैयार करेला।

000

राज्य रा सात विधानसभा हलकां मांय उप चुनाव बाबत दाखिल करी ज्या नामपानां री आज जांच करी ज्यी। आं सात सीटां सारू कुल 118 पर्चा दाखिल करी ज्या हा। निर्वाचन विभाग ऊं मिली जाणकारी रे मुजब 11 नामपाना नामंजूर करी ज्या है, जद के दो पर्चा पाछा ले लिया ज्या। दौसा मांय 4, देवली-उनियारा अर खींवसर मांय 2-2 अर सलूबर, चौरासी अर झुन्झुनू मांय 1-1 पर्चा नामंजूर कर दिया ज्या। रामगढ़ मांय सगळा 14 पर्चा मंजूर कर लिया ज्या। देवली-उनियारा मांय 2 निर्दलीय उम्मीदवार पर्चा पाछा ले लीना। उम्मीदवार 30 अक्टूबर ताई नाम पाछा ले सके है। आं विधानसभा हलकां मांय उप चुनाव सारू 13 नवम्बर ने वोट पड़ेला। इण ऊं पैली 85 साल ऊं बत्ती उम्र रा बुजुर्ग अर दिव्यांग मतदाता 4 ऊं 8 नवंबर ताई घर ऊं ई वोट दे सकेला। 23 नवम्बर ने वोटों री गिणती करी जावेला। ई बीचे विधानसभा उप चुनाव री तारीख ज्यों-ज्यों नजदीक आ रही है त्यों-त्यों प्रशासन री तैयारियां ई जोर पकडबा लागी है। दौसा विधानसभा हलका मांय न्यारी-न्यारी ठौडां फ्लैग मार्च निकाळ र वोट देवण वाळा ने हिफाजत रो भरोसो दिरायो जा रह्यो है। फ्लैग मार्च मांय अर्ध-सैनिक बल, राजस्थान पुलिस अर आरएसी रा जवान गश्त कर रह्या है।

000

उपभोक्ता मामलात, खाद्य अर सार्वजनिक वितरण मंत्री प्रल्हाद जोशी आज नई दिल्ली मांय भारतीय खाद्य निगम शिकायत निवारण प्रणाली अर एप रो उद्घाटन कीनो। ई मौके वे कह्यो के सरकार शिकायत निवारण तंत्र माथे सब ऊं बत्तो ध्यान दे रही है। वे कह्यो के शिकायत मण्डावण ऊं वां रा निपटारा ताई पूरो काम ऑनलाइन व्हेला।

000

केंद्रीय शिक्षा मंत्री धर्मेन्द्र प्रधान कह्यो है के भारत हर हलका मांय तेजी ऊं विकास कर रह्यो है अर इण मांय नौजवानां रो खास योगदान है। वे आज उत्तरप्रदेश रा वाराणसी मांय आईआईटी-बीएचयू रा 13वां दीक्षांत समारोह मांय बोल रह्या हा। प्रधान संस्थान रा अनुसंधान रा बूता ने बधावण सारू करीब चार सौ करोड़ रुपया री परियोजनावां रा काम री सरूआत ई कीनी। शिक्षा मंत्री न्यारा-न्यारा कोर्स रा एक हजार 954 विद्यार्थियां ने स्नातक री उपाधि दे र नवाजा।

000

भरतपुर रा मेडिकल कॉलेज मांय लारला दिनां व्ह्या रैगिंग रा मामला री सरूआती जांच मांय सात सीनियर छात्रावां समेत 10 विद्यार्थी दोषी मिल्या है। आ सगळां ने 7 दिन सारू निष्कासित कर दिया ज्या है। मेडिकल कॉलेज रा प्रिंसिपल डॉ. तरुण लाल आ जाणकारी दीनी। वे बतायो के दोषी विद्यार्थियां रा मायतां ने बुला र मामला री जाणकारी दीरीजी।

000

राज्य सरकार प्रदेश रा माइनर खनिज री लीज री मियाद बधावण रा हक संबंधित खनिज अभियंता अर सहायक अभियंता ने दीना है। इण ऊं माइनर खनिज री खान वाळां ने लीज री मियाद बधावण सारू न्यारा-न्यारा लेवल माथे अर्जी देवण री जरूरत नी व्हेला। खान विभाग रा प्रमुख शासन सचिव टी. रविकान्त आ जाणकारी दीनी। वे बतायो के हाल ताई माइनर खनिज लीज री मियाद बधावण सारू हाल ताई राज्य सरकार, निदेशक माइंस, अतिरिक्त निदेशक अर अधीक्षण खनिज अभियंता रा लेवल माथे अर्जी देवणी पडती ही। रविकान्त बतायो के माइनर खनिज री खानां रा पट्टाधारी अर लाइसेंस धारकां री क्वारी लाइसेंस मियाद साल 2040 ताई बधावण पाछे जमा करायी जावण वाळी प्रीमियम री रकम ई पांच किश्तां मांय जमा करावण री छूट दीरीजी है।

000

सार्वजनिक जीवन मांय सत्यनिष्ठा वे बधावो देवण अर भ्रष्टाचार मुक्त समाज बणावण रो लक्ष्य हासिल करण सारू आज देश भर मांय सतर्कता जागरूकता सप्ताह सरू व्ह्यो। ई सप्ताह रो मुद्दो है— राष्ट्र की समृद्धि के लिए सत्यानिष्ठा की संस्कृति। ई सप्ताह री सरूआत मंत्रालयां, विभागां, सरकारी उपक्रमां, बैंकां अर दूजी संस्थावां रा कर्मचारियां ने शपथ दिरावण सागे व्ही। केन्द्रीय सतर्कता आयुक्त प्रवीण कुमार श्रीवास्तव अर ए एस राजीव नई दिल्ली रा सी वी सी मुख्यालय मांय अहलकारां ने सौगंध दिरायी। दिल्ली रा आकाशवाणी भवन मांय ई आकाशवाणी री महानिदेशक डॉक्टर प्रज्ञा पालीवाल गौड़ अहलकारां ने सत्यनिष्ठा री सौगंध दिरायी। प्रदेश मांय सतर्कता जागरूकता सप्ताह री सरूआत रे मौके आज शपथ रा कार्यक्रम राख्यी ज्या। जयपुर मांय न्यारा-न्यारा महकमां रा दफ्तरां मांय अहलकारां अर कर्मचारियां ने शपथ दिरायी ज्यी। आकाशवाणी जयपुर रा दफ्तर मांय ई अहलकारां अर कर्मचारियां ने शपथ दिरायी ज्यी। जोधपुर रा अखिल भारतीय आयुर्विज्ञान संस्थान-एम्स मांय सत्यनिष्ठा शपथ समारोह सागे ई सप्ताह री सरूआत व्ही। सतर्कता जागरूकता सप्ताह रे दौरान कर्मचारियां री भागीदारी बधावण सारू नारा री होड़, व्याख्यान, ऑनलाइन सवाल-जवाब अर साइक्लोथॉन सरीखा कार्यक्रम राख्या जावेला। भीलवाड़ा मांय केन्द्र सरकार रा न्यारा-न्यारा दफ्तरां मांय आज पोस्टर रो विमोचन कर र सप्ताह री सरूआत करी ज्यी। कोटा मांय राजस्थान स्टेट गैस रा अहलकारां अर कर्मचारियां ने प्रबंध निदेशक रणवीर सिंह एकता, अखंडता अर

सत्यनिष्ठा री शपथ दिरायी। भारत रत्न सरदार वल्लभ भाई पटेल री जयंती रा सिलसिला मांय हर साल सतर्कता जागरूकता सप्ताह मनायो जावे है।

000

युवा आपदा मित्र योजना रा तैत राष्ट्रीय कैडेट कोर, नेहरू युवा केंद्र संगठन, राष्ट्रीय सेवा योजना अर भारत स्काउट्स एंड गाइड्स रा दो लाख 37 हजार ऊं बत्ता खुद सेवकां ने सिखावण दी जावेला। केंद्रीय गृह सचिव गोविंद मोहन राष्ट्रीय आपदा प्रबंधन प्राधिकरण रा 20वां स्थापना दिवस रे मौके आज नई दिल्ली मांय राख्यी ज्या जळसा मांय ई रो उद्घाटन कीनो। ई रा तैत सामुदायिक खुदसेवकां ने आपदा रो सामो करण री सिखावण दी जावेला।

केंद्रीय गृह सचिव कह्यो के ई रा तैत कम ऊं कम 50 फीसदी महिलावां ने सिखावण देवणो तैय करी ज्यो है। ई साल जुलाई महीना मांय केंद्रीय गृह मंत्री अमित शाह चार सौ 70 करोड़ रुपया ऊं बत्ता खर्च वाळी युवा आपदा मित्र योजना रो प्रस्ताव मंजूर कीनो हो। आ योजना आपदा री शंका वाळा देश रा तीन सौ 15 हलकां मांय लागू करी जावेला।

000

सशक्त समाज अभियान रा तैत आज बाड़मेर मांय दिव्यांगजन सारू ऊपतू अंग मुहैया करावण रो कार्यक्रम राख्यी ज्यो। जिला प्रशासन अर सामाजिक न्याय अर अधिकारिता विभाग री ओर ऊं राख्यी ज्या ई कार्यक्रम मांय दिव्यांगजन ने ऊपतू अंग अर उपकरण दिया ज्या। ई मौके वाणिज्य अर उद्योग राज्य मंत्री के. के. विश्नोई कह्यो के समन्वित प्रयास – सशक्त समाज अभियान रो मकसद दिव्यांगजन ने सरकारी योजनावां रो फायदो दिरा र वां री जिन्दगी बेहतर बणावणो है।

000

राजस्थान कर्मचारी चयन बोर्ड इम्तेहान देवण वाळां ने न्यारी-न्यारी भर्ती परीक्षावां सारू अर्जी देती बगत सावधानी राखण री राय दीनी है। बोर्ड एक पानड़ी जारी कर र उम्मीदवारां ऊं मूल पहचान पत्रां मांय लाग्योड़ी फोटो तीन साल या वां ऊं जूनी व्हेवण परां पहचान पत्र मांय नुवी फोटो लगावण री राय दीनी।

000

पाली जिला रा सोजत मांय आज प्रधानमंत्री सुरक्षित मातृत्व शिविर लगायी ज्यो। शिविर मांय आस वाळी लुगाइयां रा स्वास्थ्य री भांत-भांत री जांचां कर र दवाइयां दीरीजी अर बेहतर खानपान रा बारा मांय जाणकारी दीरीजी।

000